


adır u asme



QEMER É ALI

(kamer söylemez)

PIYA
KİTAPLIĞI



Qemër ê Ali
Dersim'de
amo dîna.
Desuponc
seryo
Almanya'de
cuyaeno.
Qemêr hata
nîka zu
kitav nusno.
Na kitavi
haleta Musa
Anter hete
doskariyera
guerete.
Zuki Qemêr
hîre seri
Radone
Duisburg'de
Program eve
zazaki virast

qemer ê ali

(KAMER SÖYLEMEZ)

•
adır u asme

kıtavxane piya - 15

adır u asme
qemer ê ali

dovos 1: 1995

fotoğrafê seriki: a. özgen utku

vırastanea seriki: veli kahraman

amadise teknik: pi tanıtım

dovos: günay matbaası/544 34 31

PIYA KİTAPLIĞI

Büyük Parmakkapı Sk. 7/4 Beyoğlu/İstanbul
tel: (0.212) 245 28 03 tel/fax: (0.212) 249 26 53

adır u asme

qemer ê ali

(KAMER SÖYLEMEZ)

ti nasnêkena 5	neq sîmae 35
tarva gîrane 7	ti u haskerdis 37
isoniye 8	vîsturiye 38
merdena xase 10	cuyais 40
famkerdis 10	tuske 41
qolmd11	dît selike est delîke 43
waxte weşi 12	ti ke şîya 45
ax dina 17	belkiya 46
bome 18	herey mekuyê 48
delala mîra 20	asme 50
vijeriye 21	demîrqîrasi 52
zote mî 23	saekerdene 53
bê 24	peyniyede 54
meberve dae 25	niyo 55
ğeal u raştiye 26	omud ho mebirne 56
meste 28	rew bê 58
lori 29	rusnaena To 59
murdari 31	veyvike 61
cerabiyais 32	çena ale tunedi 63
bîraeni 34	welat cîko 69
	ere 71

tı nasnêkena

tı nasnêkena bêvegenia sewe
usaride
eke usari ame vore viloşiyero
qe şiya tever u gos naro ser
u hesna xule xula deru
çutır şikinero juvini
xule xula deru u bêvengenia sewe

tı nasnêkena estena zeria bele
haskerdenede
eke haskerdis ame zere
u aqıl şî feteliyais
qe to eve na tore haskerd
zonena tı seveno
aqılke şî feteliyais
çutır ceneme beno cenet
waxtoke mordemi hora haskerd
u ho ve ho haştiede cuyaene

tı nasnêkena estena toximi
hiegaude
eke mirçıku peyde qut werdenê
qe to hiegayi sakkerdi
birna eve na tore qute yine
ez nae naskenu yi sone
waxtke ame onca yene
eve haştie

tı nasnêkena tija sodiri
usaride
eke ae este koe jele
qe tı honde rew ustara dewede
di dar u beri çutır benê keweyi
çutır işta mordemi bena ra
cuyaene çutır wesa o waxt

4 6

tarva girane

*bê to ontene
tora ontenera rind*

isoniye

isoniye isoniye
tı ke vana dina wesa
urze isoniye
meverde
eve taru u bombu
pul u koe ma dujve
eve adır u bombu
birre ma bivêse
meverde
çel u çuke ma
eve tufongu u qazu
bêre kistene

isoniye isoniye
tı ç a nisenaro
u ç a qayıt kena
eke birre ma vêsay
eke pul u koe ma bi duji
eke çel u çuke ma kışay

urze isoniye
ceng bike verva hervi
ceng bike verva kistene
u duzkerdene

isoniye isoniye
tí ke wazena ho bixelesne
urze ramekuye
qayít meve

urze
bívindarne hervu
bískine cekú

urze
telefke vêsaniye
urze
bareke aboriye

isoniye isoniye
urze
hurênda ho de mecemediye
bê ho ser isoniye
bîsermae isoniye
bîne hard kuye isoniye
koke to bêro isoniye
ça ho nanaro keriyé
uzağve korvo ha

tí ça nisenaro
u ça qayít kena
eve na tore
tí eve ho
ana koke ho isoniye
urze urze

merdena xase

eke eve bê namusura
u bê namus cuyaena
rew merdene eve namu
tenena rinda

famkerdis

kamke mu famkeno
eyde sonu merdene

qolind

zumustono çenê vore vorena
muae axurrede mali morena
aşir amê qolinde to birnenê
zeria muna bele çenê torê vêsena

çeme munzur xori xori naleno
kemer kuçi dar u beri tey ano
son u sodır raa to de niadanu
tı ça nina çenê sevre mı qedino

urze çenê hale mı zof persano
çond rojyo pize mı vêsano
tıke wastena mı qewılnekena
bulusk sola çenê eve to sano

sodıro çenê tiji nawa vejina
ez nêurzenra teqeta mı çina
çıke mı esto kefenê mı bje
katıre haq sane çenê urzera şime

eke hona astarey nêvejiye
gemê hetê ma roşt nêviye
dere u birri hona hewndere
urze şime waxt na waxto

tıke nina hore tı zonena
qey nisenaro qey bervena
bervis torê tomete niyo
qerar bıde çenê xatune tiya

waxte weşî

ç1 weşvi ç1 weşvi
waxte dewe
waxtoke
sodır tiji estene
koe jele
u cenî ustenera
ceniye
fiştane surî
fiştane zerdi
fiştane keweyî

ç1 weşvi ç1 weşvi
eke yine ho tadênê
do sanîtenê
u mirçîku
gîle tûyura wendene
waxtoke
hiegai biyene keweyî
u kağ biyene

ç1 weşvi ç1 weşvi
waxtoke
kengeri vejienê
u pepugi wendenê
waxtoke
vore vileşienêro
u homete şiyenê waru

ç1 weşvi ç1 weşvi
waxtoke
hiegai biyenê zerdi
u waxte
velg amaene
dere çirtikede ey birnaen

ç1 weşvi ç1 weşvi
eke ora dime
dar u beri
game cor u ceri
biyene zerdi

ç1 weşvi ç1 weşvi
waxtoke
vore vorenê
piye mı hiedık u
lekane ho guretenê
u mal u gayre
çığır vetene
waxtoke
vore cemediene
mı çesane ho guretene
u pole cencalura
hata payızge
ho ğıştkerdene

ç1 weşvi ç1 weşvi
waxtoke
veyvune dewede
coyunude
eme, bese, ğeze
nade, mede u xece
bezna ho tadenê
waxtoke
veyveyi biyene
u mem u feq
doul u zurna
cınitene

ç1 weşvi ç1 weşvi
waxtoke
ma şiyenê waru
xort u
çenekune ozevu
raera govendi guretenê
u kîlam vatenê
u eve na tore
esq u sewda
eskerakerdene
waxtoke
ora dıme
deniskar biyenê
muley mora birnenê
u xonçade astık
sıkıtenê

ç1 weşvi ç1 weşvi
waxtoke
ma
esqe yinere
murode yinere
jubiaena yinere
zewejaise yinere
sarvet simitenê
waxtoke
mısayiv u zamay
soe estenê
u ma
hot hoto kerdênê

heya lawo

ç1 waxtvi

ç1 waxte weşvi

ax dina

her muloçkera vano
ala bê reye tokêri
muloçike vana
ma hore lone bivine cıke

kêwraki kêwraera vano
ala bê reye bikeme
kêwrae vana
wiy kêwra haqve to sano
ikrar werte madero
kêwra vano
ma hora tore vanu
lona mija to bena hira
tew dina ti bivêse

bome

çenê çenê
çiko çivao
tı çıka
u ç'a honde
giraniye kena
u ho goynena

tıke nêzonena
ez tora vaji
tı hora zu sosına
tı jê dara
pelgê to çinê

tı jê asma
roşta to çina
tı jê tija
germenia to çina
tı jê astaria
nêbereqina
tı jê hera
gose to tenê kilmie

çenê çenê
haqvo pirvo
rayvervo koçekvo
seymemedvo qemervo
tı taa niya
tı eve site here
goj biya
bomê bomê

delala mîre

cıqâşke mı zona
peyniyede merdene esta
oncaki
merdena to famnêken
yaki
merdena to eve na tore

vijeriye

endi gos nêdan
yi kîlamune wesu
rozeke eve germ u nazikeni
ma kotenê vîrara jûvini
u bojiye ma jûvini serde
amenê peser
u rozeke pîre haskerdişvi
yi endi peyser mend roe

ho vira nêken
u besenêken
rozuneke tî vîrara mî de
eve mîrodi berva
ez yi rozu
ho vira nêken

niya torê van
gul u gulistanvo
her cae to
sur u belekvo
her hewnê to
roşt u wesvo
dina to
wesviye
cuyaena min u to

ez
yi rozu
yi satu
u waxtu
ho vira nêken
u nae besenêken
cane

zote m1

çenê
nêvoro tore rama haqi
bivoro torg u torjile
çeneka
ro qilerine por surela
birusno tore avdil mursa
kurela

bê...

cuyaene
bê serbestiye
bê isoniye
bê haskerdis
u bê to
ninara mı vir

bindestenrê vile cewt nêken
bê serbestiye nêvinden
bê haskerdis cuyaen nêken
bê to hewn nêvinen
rau olağe nae çine

çiqake inqılapra hasken
çiqake dez nêwazen
çiqake haskerdis wazen
çiqake cerabiaenere
damisneven
u çiqake serbestiyere
tesaniya mı esta
tora honde hasken
u ti honde kotara mı vir

bê ğua mı
bê nune mı
bê roşta çımune mı
bê zeria mına bele
bê derd u weşiya mı
bê bê...

meberve dae

meberve dakıla mı meberve
heştire to helaşer nêbene
nequne homete nêxeneknêne

mede dakıla mı mede dısmênro
zote to zılfiqar nêbene
vile nequne homete nêbırnenê

meke dakıla mı meke qırva haqire
bıza kole manga bore vozne qeri
yi lewe haqide qewılnebiye u nêbenê

ğeal u raştiye

sewe biye niştneroy
sımt
seker çıke teynavûne
sımt sımt qefelûne
şune cıle
mı hewn di
vake
meste haq comerdo

sewa bine onca
niştneroy sımt
haqvo pırvo
zu suse sarav
eve na tore
hal u waxte mı bi xırav'

onca qefelûne
u şune cîle
mu vake
ezke yima ben
ma ç'a simen

a sewa na sewa
ne yima ben
ne ki simen
ç'ike ez vanke
no senê haço ke
seytan de basnêkeno
u a sewa na sewa
ez teyna hore yima ben

meste

kamke wazeno şero meste
gereke vîjer biaro hovir
kamke nae nêkeno
sodîre ey çino

lori

lori lori lori
lora cani
bê na het
lew ve tora ni
dak' ve bak'ra
biye sayi
kerde vıla
niaz u qırvani

lori lori lori
lora wese
na hetra bê
tı meterse
ana fatma
torê qırse
dana fızılro
eke ame hierse

lori lori lori
lora mîna
bê na het
sefkana mîna
çek u şimşere
ho guretê
lore saydara mîna

lori lori lori
lora çemi
urze şime
diare çemi
ğua çemi zof zelala
aznadere na moseyi

murdari

şere ro şere
uzara şere
aqlra kemi
mezgra kud u kireji
sıma çı demırqırasıye çı
deste sımade kardi
hata zoni gondere
demırqırasıye
ne harde sımade roa
neki çelu çuke sıma
eve ae biye pili
a welate dismene sımara yena
name sıma merdena isoniya
sımare çı demırqırasıye çı
bıkıse bıkıse gonewêri
kıstoğe isoniye

cerabiyais

nêşune u nêard
gula gula ho
mı ewro
çıke a gule
gula mı niya

eke kotera mı vir
aera melema mı
vatene
endi nêvan
çıke a meleme
melema mı niya

zone mı nêçerexino
tora vajine
roala mı
endi nêvan
çıke ti
roala mı niya

ha
niyaro
gule
melem
roe
verva mu de
resme to
zone mu de
namê to
na cerabiaena
yi sekereke
sekereke

bıraeni

bıraeni heni nêbene tırko
çond seriyo dana maro
eke bıraeni wazena
ma tertele meke endi
tı hora eke kota tenge
bıraeni anara ho vir
pê ma xapnena
hora fina duri
êke ama ho ser
nanaro onca ondêre mavzeri
nêverdana mara az u uzi
tırko bıra
ewro endi peyniya
peniya bıraenia
mın u tüya
ez endi ustnera
reyna ronênisen
eke piya cuyais wazena
lüyeni meke tırko tırko

neq sımae

mıra mevazê
osenek vınde
naere haqa sıma çına
mıra mevazê
mezır çê
naere ki haqa sıma çına

zırçena mıra mevazê
temperamento
u zırçena mı
zu het meerzê
mevazê zırçene nêqeniya

sımara vaji ez ça zırçen
ha sımare cengi
ha sımare vêsanie
ha sımare bındesteni
ha sımare hozer merdene
ha sımare teynamendene
ha sımare tolankerdene
ha sımare xorvinitene

ez çütir osenek vindi
naera gore
ez ke nêzırçine
kam bızırço
kam bızırço

neqeniya zırçais
temperamento zırçais
dez danq zırçais
neqeni dana zırçais
ez zırçen
zırçais haqa mına

tı u haskerdis

tı u haskerdis
sıma jê şa u sıpiye
qe nêşikineru juvin
zovnaise sıma hondero
şıma juvinra duriye
jê asma zerde u harde dewrêşi
zu dina gırse esta
mavenê sıma de
haskerdis dergusa qefelais u sevriyo
ye to ne sevr esto ne qefelais
tı çutır qeseykena
haskerdisra
ri şae

visturiye

niştmero ma telewede
haskerd juvinra can ve cani
kudvo çenê mua to
isot kerdo doe ma

sımt sımt bime serxoş
juvinre bime derd u nêweş

isonvûine tora haskerd
mı yelçi rusna çe sıma
lalvo çenê mua to
hermeni vato mıra

gos da gos da bûne pêrsa
isonenre bûne posema

ez zof biyene sa
eke bîmendene hermeni
çenê mua to zof caila
taae hora ar nêdi

fam bîkero cîre xervo
her qefîliyere axurrevo

mua to bê warewa
piye torê kolewa
mîra vato bê karo
eve ho ki carîya

nae bîzone aere beso
venge mî şero duzgîn bavay reso

cuyais

darera gule mebirne
çike ti mira haskena
eke cuyaisra haskena meke nae
nae meke eke haskerdene famkena
so tever boeke gulu darera
çiçegu mergude koura nezgızu
xatire haq sane meonce kokera belezere
eke honde lona derjen hõra haskena
meke nae
her çi hurênda hode weso

tuske

nejdiye gozenekude
tuska mı jiara seymemedi
mare wayireni nêkerde
zovna herkeşre comerdi

tew tew tuska mı
kam bıdo rıske mı
tew tew tuska mı
kam bıdo rone mı

merga gozenekuna
dorme de darê gırşi
dismene to mı nêdiya
cıke serra ko u gerışı

tew tew tuska mı
kam bıdo rıske mı
tew tew tuska mı
kam bıdo doe mı

merga gozenekuna
cere kırıkude sulula
hesere tuske zorkerdo
zere mı de adır u kıla

tew tew tuska
kam bıdo rıske mı
tew tew tuska mı
kam bıdo herise mı

vaze feqiro seydali
ewro teyna şıyo mali
cire jede diya oli
tuske kerda boka vergi

tew tew tuska mı
kam bıdo rıske mı
tew tew tuska mı
kam bıdo toraqe mı

dıt selıke est delıke

sıma mare wayir nêvejai
qoriye karsıniye kemere duzgını
werd sıma şene u posteyi
da sıma pi u kalik rıske ma

sıma mare wayir nevejai
qelxeru gola buere vile meravi
mendime vêsa da sıma
kerdime bavoqe sıma pi u kalik

sıma mare wayir nêvejai
jiaru diare hete ma
verdaima ma tengede
nêguretime bine perune ho

sîma mare wayir nêvejai
nîka vêsene hard u asmenê ma
çimê sîma roştve bê kîrameti
bê ma roza sîmaki çina

sîma mare wayir nêvejai
besenêkerd ho qorikere
bîrna sîma riske ho
xojive bê haquvo nêda
werd eve ho

sîma mare wayir nêvejai
qoriye karsîniye kemere duzgîni
savajî sîmara ewro na tengede
sola lew u pîrnukune sîmara bêro
nîaz u qîrvane ma

tı ke şiya

tı ke şiya uza
mire biya wela estemoli
wela botani u dersimi
yintera vaze
ez çond seriyo goçerüne
vaze yi xatire haq sane
mire lope wele birusne
juki yintera vaze
ez nêwazenu peyser berine
çike hona harde ma sero
isoni yene kistene
derguşi vırara muawude kadbene
yintera vaze
endi hewnra raurze
çike hewno derg merdena

belkiya

meyit belkiya yenera zu
esqe mı ke torê bızonê
haskerdise mı de fızıleni çına
mı fam bıke roala mı

ez mamekiye' raune nêzonen
welate to nasnêken
bê to belkiya besenêken
urse şime melema mı

roze yena eve tiji
eve haskerdis bena cuyaene
ma keyke juvin di
o waxt wesa cuyaene

gul u nergij benê ra
mijdania usar danê
esq u sewda werde ma
hayde urze xana ma

seweta to koyi riznayi
heval u cirani deznayi
meve bêxeri çena xali
keremke bê urze şime

dewran biçerexiyo bêro
deste ma juvin bijerê
rozune rındu tı qemer de
viarnena ra sosına mı

herey mekuyê

deşti tırakerdenerê
paçkerdenerê lewi
ame virastene
nê zuru kerdenerê
nê mılqi kerdenerê
nê tıfongu estenerê
xıraviye meke
eke dara mı aste
ezki mılqi ken u kisen
to ki ho ki
o waxt
keşra ne xatır wazen ne ef
endi zeria bele nêerzena
nêhesnen taa u famnêken
ca ameyme na dina u cuyaeme
qe sîma hora perskerd
çiko na pêrodais u qefelais
peqeznais u xıraviye
seweta vajimeke se sere
cuyais

cuyaise xaşre
non u dou qate cıl beşye
gosedê
pir sultan darde bi
isa ame çormix
niade

• yi çond sey seryo cuyaene
yinere merdene çina
ma ma
este tomoşil u firfirike ma
esto mal mılke ma
onca bê murodme hervu keme
çıke çino aqıle sare ma
meraq mekere
peyniyede some lewe qetrani
o waxt aqıl yeno sare ma
eke kel ame keli serde

asme

asme vejîya asma zerde
kîle damayi kou ser de
çenê xatîre haq sane
bê mau piye ho caverde

asme vejîya asma letiye
çenê urzera ma şime
delal ro u yimane mî şî
cond seriyo yen to dime

asme vejîya asma pîre
heru kerdo zîre zîre
qîrvane to bîza kole
bijeki kerdo qîre qîre

asme vejiya asma cori
roşti dana cao tari
derde to zof gıranviye
damisnêviye tewres qelvi

asme vejiya asma ceri
guret mıra aqîle sari
jıveno ondêre zeri
biyo husk jê mermeri

asme asma qemer'ya
eyra qeir keş nêdiya
hover erze çıla çe ma
çor asmiye na şeriviya

demırqırasi

ponc milyar isoni
seuheřtauponc dewleti
xele dulgerude vêsaniye u
nêweřiye
poncas dulgerude herwi
çeku vırazeme u juvini qırkeme
oncaki vame ma demokratme
tew haq adire ma wedaro

saekerdene

ceren ko u gerisura
serbestiye kenu sae
cerenra yenu dewe
zof zorkena kesreta ae

derd'ke este derman'ki este
duzgın bavay ra dilegi waste
ewro nê belkiya meste
yena çê mi bena haste

roze esta tij nêvejina
sewe esta asme cerina
meke zuru rasteni vase
yena hiers dina rijina

bıke qale isoniye
qımet bıde ciraniye
hasbıke eve mordemiye
zovna yena tewraniye

dewrano no cerexino
tijiya na bereqina
astaro no teyna niyo
asme vejıya roşti dana

toxım berze jil dano
eve ho taa nêbeno
aze rone bena dare
bê ğue kewe nêben

peyniyede

roze yena zur yeno werte
reştie ho dana qewilkerdene
no zovnaise hurdemino
hurdemenaki deznene
naki jubiaena hurdemina
eke heniyo
bije rasten vozde zurura
na rualra
ceng bike verva zuru
ceng bike seweta reştie
juki aqile hora meveze
eke bervisre torenaise to çino
huyaise to berqêstia

niyo

dızdeni meke haq esto
duzgın bava cail niyo
marê comerdo dosto
xızıro kal teyna niyo

herediyais qe rınd niyo
pêrodais eşqe mı niyo
cor roj dina meraz meke
cuyais zu roze niyo

qıre qıra bijekuna
zıre zıra na heruna
qore qora na manguna
naxır bê wayir niyo

qımet bıde jiar u diari
meke çenê persê sari
zu hewari zu suari
qule haqi bê çek niye

bêbextiye qeder niya
jıvena to çare niya
urzera momira cıfiye
waxte rakotene niyo

çenê meke gıraniye
ho vira meke vırraniye
rojiye ni yene sone
haq teyna haqe to niyo

omide ho mebirne

omide ho mebirne
roze yena tij vejina
werte beno roşt
kori vinene, hesnene qeri
kudi besekeni bifeteliye
bom benê baql, domon pili

omide ho mebirne
koy honde berz niye
roze yena vore vileşinaro
o waxt
merg u hiegay benê kêwey
gul u nergij benêra
meşi hemge kenê top
ti endi qerm niya
u bena cıncık
çiçegeve çiçegera fetelina

omide ho mebirne
zumuston vêrenora, omnon yeno
o waxt beno germ
temuji wanenê, vêsna tiji
din u yimane ho çino
her çi şiyê keno sae

omide ho mebirne
a rozeki yena
deşi rijine, dêse xepıxanu
dêse xepıxanu qafıkude
o waxt
endi deste to kelepçe niye
xepıxaney çine, tomete ki
domone to ki benê
u tı cıre kurnıkede
lorıka haştie vana

omide ho mebirne
rindeni u sosineni biara ho vir

rew bê

rew bê çenê bê çe ma
derdu meke zere ma
ezke yenu çe sîma
tî çîa mîra remena

tî zaranca çe sîma
ez koçmeke dewa ma
tî cao qolayra niya
aşîr kote werte ma

urze bê na dewa ma
ye sîmara rîndeka
koe serê dewa ma
şîye dane çe sîma

momi rusna hometere
ame pêser xorte ma
doul u zurna cînene
gureto de veyve ma

sorvîk u gost deyrae
bore cirani bore
dest u pae ma heneye
ceni têde berviye

peruge virazene
seweta ma kaykene
cek u mavzeri oncene
tîrnge tîrnga erzêne

rusnaena to

tı şiya
ne ne delala mı tı nê şiya
ho neğeletnenuke vajine
tı rusna
yine tı rusna yane hevalu
çı hevalvike tora vake
domona nezonena u famnekênê
heni vake u tı rusna
tora persnêkerd u fikre to nêguret
vake tı politika nêzonena
yine coka tı rusna
teewwww çı hevalenia çı qewğawa
seweta serbestiye u isoneni
mordem mordem niyo na cematde
hama tı isona u gosda yiye binu
perse heval u naskerdoğu guret
to vake ison isono fikre bomki guret
bomuraki perskerd seweta raştie
hama zurekeru tı kerda qırva

tı rusna verdayi zurekeri ita
hiefe mordemi yeno na domonure
hiris çewres poncas serudere
por biyo sıpe hona perse bakıl kene
kamılme vane çıke por kerdo sıpe
tew çı kamılenia na herude
heya delala mı na kamılu tı rusna
nezonaena kamılenia naynu
zulm u zorvejenia na gıranenia
tora persnêkerd rusna tı delala mı
nêverdake xatır bıwaze qom u qevılra
teewww çı hevalenia çı kamılenia
çı serbestiya seweta serbestiye
eve deste hevalu u na tore merdene
na çı qewğawa çı serbestiya
seweta kami u çınayi

veyvike

sewda mı dıganiye veyvike
ha ard ha ana dina
kam ç1 zono ç1 beno
ya çeneka ya lazeko
heni osenoke zu can yeno
cuyaisra nasive ho ceno

sewda mı dıganiya veyvike
ha vejıye ha vejına
her ca beno roştı
ha tiji ha asme
heni osenoko roştıye yena
sewqe ho dana kowu u dewu

sewda mı dıganiya veyvike
biya ra ha bena ra
ha nergize ha belezere
heni osenoke kulelike bena ra
mıjdaniya usari dana

sewda mı dıganiya veyvıke
koteracı ha kunaracı
ha momiya ha çılawa
vêsenâ hata peyniya cuyaiş
qe wenesona veyvıke

sewda mı dıganiya veyvıke
biye ha bena wese
ha dırveta gırane ha senıke
heni osenoke weşiye yena
tore ki mire ki
serserra to wesvo veyvıke

çena ale tunedi

nêdiye ko u gerişi
nasnêkena bijek u guki
sukede biya pile juki
çena ale tunediya

mua hora mılqi kena
oncaki perse ae kena
zof caila nêzonena
çena ale tunediya

piye hore zotu dana
pê perse ho qe nêcena
dızdiya nisenaro bervena
çena ale tunediya

tek u teyna fetelina
waxtke ame qefelina
zof tersena recefina
çena Ale tunediya

heni ame heni şiye
qesaşi çinevi herediye
eve zuru xerepiye
çena ale tunediya

roze esta ri wayisa
roze yena zof ğayisa
têlmase pır eve hiersa
çena ale tunediya

perena ra cincınka
ništa zılvra jê vızıka
ne bırosa ne ğızıka
çena ale tunediya

bine çımura huyına
yeme zerira berverna
sırre ho keş nêdana
çena ale tunediya

nêzonena cuyaeni
qelv de esta xıraveni
famnêkena isoneni
çena ale tunediya

hete beznara bariya
fıkre hora zof tariya
zuru kena zof ri şawa
çena ale tunediya

serdına jê cemediya
mirena qe hayre ho niya
jê sılonde zılv rıjiya
çena ale tunediya

zumust yeno cemedina
usar yeno ranêbena
payız yeno zerd nêbena
çena ale tunediya

eke germ di araq dana
eke serd di cemedina
coka ron u toraq nêdana
çena ale tunediya

ne paka ne kulelika
ne veyvika ne vilika
zof nazık u fek lastika
çena ale tunediya

merazra zof haskena
rındeni çıka nêzonena
eke merde ax tux kena
çena ale tunediya

her waxt kena caileni
ğezna niya sosmeni
yima bena a ki heni
çena ale tunediya

roze esta zof esqliya
roza bine zof berverna
derde ho mıra nêvana
çena ale tunediya

eke mızeyi kerdı tırşı
çımı tenena benê girşı
ceranêkena wes u tuji
çena ale tunediya

cıqake pıla hondeki qıza
yinat kena jê bıza
ha uzara ha nazara
çena ale tunediya

cuyaena tene zora
çena Alya manga bora
zof serdına onder vora
çena ale tunediya

cuyaeni heni niya
derde ae xıraviya
cıke çe de rındeni çına
çena ale tunediya

zof wanena jê bılıla
her keşre lew kena vıla
eve name bêxer gula
çena ale tunediya

yeme tevêrra bereçına
yeme zerira kerazına
heto binraki merazına
çena ale tunediya

roze nediya bêbexta
tij nêdiya pirotkına
waxt de nêame bê waxta
çena ale tunediya

nuka viştuses serdera
onca ki caila murdara
ama dina bê dinawa
çena ale tunediya

dar u hiegai biye kewey
veyv u zamay biye newey
hewnde menda kota herey
çena ale tunediya

tenıka jê pelge dare
xuydara jê nala bore
serdına jê cemed u vore
çena ale tunediya

sondu wena jê rayveru
henke huska jê kemeru
nasnêkena xêr qelxeru
çena ale tunediya

qırvane bine linga ğeza
vêsnena ded u bıraza
nêwazena xêr nêxaza
çena ale tunediya

ne hermeta ne canıka
jê meyitiya oseneka
raştie de jê pizanga
çena ale tunediya

cime girşi çime gayi
ğue sona der u vayi
nasnêkena wa u bırayi
çena ale tunediya

jê asma roştî çina
jê dara pelge çina
jê çiçega boe çina
çena vle tunediya

meraz aere cuyaeno
fêke ae zur mıseno
vira kerdo haq ho sero
çena ale tunediya

kerzana na rew ber biya
cıra gon u gonaşir şiya
kılm ke vaji xerepiya
çena ale tunediya

ra u olağ qapa kerde
meraz u dej qewılkerde
yilaj u hev têde werde
çena ale tunediya

a şevaz de ama dina
estemol de biya pile
coka dost u yare niya
çena ale tunediya

welat cıko

hiegao ke ma rameme
welato!
bıza ke ma doseme
welato!
çıyo ke ma roseme
welato!
cenika ke ma cıra
haskeme
u seweta ae kıseme
welato!
koeke ma bomba keme
welato!
bırroke ma telef keme
welato!
canoke ma vêsname
welato!

welake ma sero juvin
qırkeme
u ceng vezeme

welato!

tertele isone bini

welato!

xorvinitena isoni

welato!

seweta peru kistene

welato!

seweta welât kistene

welato!

naynura qe ju niyo

welat...

harmoniya eve ho

naynura qeir

her çi

zulmo

zorvajiya

u bê welatiya

ere...

ere serdo serdo serdo
çenê ti ke çina serdo
zure toe bêçeveri
sare mi hencito zere mi werdo

ere germo germo germo
çenê germe na omnoni
esqe to mi vêsнено
na kaliye de keno domoni

ere derdi derdi derdi
melema mi derde na waxti
çenê wastena to girana
ye mi çine qoniağ u taxti

ere vaze vaze vaze
caila mi ho ser vaze
qese to xiravın u tolye
pirnêkene zere goze

ere roji roji roji
roal roza mın u tûya
ho virake meraz u deji
cuyaene ye mın u tûya

ere dızda dızda dızda
ti dızda na roe mi
bıde peyser roe mi
damisnêveno cane mi

piya kitapları

süha tuğtepe
düşler ve seyrekzamanlar

hamdi gedik
uçurum

önder kızilkaya
üzülürsün bir zaman

namık kuyumcu
belki bir şarkı

emirali yağın
şarkılar ülkesi

tuğrul keskin
tacir ve cinayet

ahmet müfid
sanki aşk

ahmet müfid
ölüm gibi, alışkanlıkla

ahmet telli
kalbim unut bu şiiri

tuğrul keskin
bir suyun kıyısında

asuman susam
bir unutuş olsun

emir ali yağın
gitmek bir uzun öykü

kamer söylemez
adır u asme

kunduz düşleri-1 kunduz düşleri-2
ortak kitap ortak kitap

PIYA KİTAPLIĞI

Büyük Parmakkapı Sk. 7/4 Beyoğlu/İstanbul
tel: (0.212) 245 28 03 tel/fax: (0.212) 249 26 53

tarva girane

*Bê to ontene
tora ontenera rinda*

110.000
KDV DAHIL